



Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Atuarfitsialak nalileqqullugu aammalu Atuarfik pillugu Inatsisartut peqqussutaata nr. 8, 21. maj 2002-meersup itisiliiffiusumik misissoqqissaarnissaanut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Tunngavilersuut:

Nunatsinni atuartitaanerup pitsaanerpaamik ingerlanissaa tamatta soqutigisaraarput, taamaattumik Inatsisartut peqqussutaat nr. 8, 21. maj 2002-meersaq tassa Atuarfitsialak nalilersuiffiiguarparippat isumaqarpunga. Ilisimasatsitut Atuarfitsialammik 2002-miit atuartinneqarsimasut siulliit atuarnerminnik 2008-p aasaanerani naammassippat, taamatullu peqqussut naapertolugu atuarnerminnik tamarmiusumik atuartinneqarsimasut 2013-imi naammassissallutik. Taamaammatt atuartitsinissamik pilersaarusiamik allanngortitsiniartarnerit aporfilersorneqartarput Atuarfitsialammut nalilersuinissaq tamakkiisoq aatsaat pisinnaammatt 2013-imi. Taamaattoq isumaqarluinnarpunga Atuarfitsialak suli pitsannngorsarneqassappat 2010-mi itisiliiffiusumik misissueqqissaartoqartariaqartoq naliliisoqarlunilu.

Atuarfitsialak ingerlalluassappat Siumumi pingaartipparput angajoqqaat suleqatigineqarluarnissaat aammalu atuartitseriaaseq ilikkarluarfusooq (CREDE) atuarfinni tamani atorneqalernissaa anguniarlugu suliniuteqartuarnissaq pingaartipparput. Tassami angalasarnitsinni ilaatigut tusartarparput ilinniartitsisooqartoq (CREDE) piviusunngortinniarnernani suleqataajumangitsunik, isumaqarpunga tamakkua piumaffigineqanngippata nunatsinni meerartagut ilaannakortumik pissarsiaqartarnerat tupinnarnaviannngitsoq. Inatsisit malillugit atuarfiit kommuunit suliassaqarfigineqarput, taakkuuppullu peqataatitsinissamut pisinnaatitaaffeqartut taamaammatt kommuunit atuarfintut peqataanerat annertusarneqartariaqartoq isumaqarpunga.

Immikkut atuartitsineq annertoorejussuarmik aningaasartuutaasartoq aqqissuulluakkamik ingerlannissaa inatsisitigullu qulakkeerinnilluartumik inissisimanissaa pingaaruteqarpoq, tassami ilaatigut tusartarparput immikkut atuartitsinermi vikaarinik annertuumik atuisooqartartoq taamaammallu pissarsiaqaataasarnera ilaatigut annertusarani.

Siornatigut ilinniartitsisorpassuit nunatsinni peqataaffigisaannik Naleqqiiffimmi isumasioqatigiittoqarmat assigiinngitsunik oqariartortoqarpoq, soorlu atuarfiup pisortaasa qanoq ingerlatsineri apequtaasorujussuusut atuarfiup ingerlalluarnissaanut, taamaammallu piumasaqaatitigut sukaterisoqarnissaa oqariartuutigineqarluni. Atuarfiit pisortaasa akisussaaffii tassaapput, atuarfimmi ilinniartitsineq atuartitsinerlu, kiisalu atuartitsinikkut anguniakkat anguneqartarnerisut nakkutigissallugit aammattaaq peqqussutit nalunaarutillu malinneqarnissaannut akisussaasuullutik, taamatullu atuartunut ataasiakkaanut atuartitsinermik piviusunngortitsinermi atuarfinni ingerlatsisut tamarmik akisussaanerminnik pimoorussinissaat pingaaruteqarpoq. Isumaqarpunga atuarfiit pisortaat aqutsisutut ilinniaqqittarnermikkut oqaloqatiginnikkut suleqatiginnikkullu pitsannngortitsinissaat.

Isumaliutersuutit ilamininngui taamatut saqqummiullugit siunnersuutigaara Atuarfik pillugu Inatsisartut Peqqussutaat nr. 8, 21. maj 2002-meersaq, 2010-mi itisiliiffiusumik misissueqqissaartoqarlunilu naliliisoqassasoq.